

Pablo Filipocjārārē ojāca pūrĩ ni'i

A'ti pūrĩ a'tiro weero ojano'pã nise ni'i

Pablo Filipino wāmetiri macã Macedonia di'tapũ
nirĩ macācjārārē ojacũ niwĩ.

Todũporopũre ti macāputa Jesucristo ye que-
tire were, cūrē ějōpeori curuacjārã sājācã weecũ
niwĩ. Bu'iri da'reri wi'ipũ nīgũ, ojacũ niwĩ.

Ti macācjārã Jesucristore ějōpeorã cūrē
niyeru weetamu'quere wācũgũ, narē e'catise
o'ocũ niwĩ. Na te niyerure Epafrodito me'rã
o'ocārã niwã. Cũ papera miarĩ masũ nicũ
niwĩ. Be'ro Pablo tiropũ dutitia wa'acũ niwĩ.
Tojo wa'acã, Pablo cūrē co'te, be'ro Filipopũ
o'ótōrōcũ niwĩ tja.

Pablo ti macācjārārē ojagũ, ne cã'rō mejēcã
ucũma'aticũ niwĩ. E'catisere, na añurō ějōpeose
pe'ere ucũyũ'rũnũ'cācũ niwĩ. “Mejō nirã ni'i nis-
ere wācũña”, nicũ niwĩ. Tojo nicã Jesucristore
ějōpeorã queoro weeya nisere ojacũ niwĩ.

*Pablo Jesucristore ějōpeori curuacjārārē
oja'que ni'i*

¹ Yũ'ũ Pablo, tojo nicã Timoteo Jesucristore
da'raco'terã ni'i. Ŭsã nipe'tirã musārē Jesucris-
tore ějōpeorã Filipopũ nirārē oja'a. Tojo nicã Je-
sucristore ějōpeori curuacjārã sũ'ori wejepeorã
quē'rārē oja'a. Narē weetamuco'terã quē'rārē
oja'a.

2 Õ'acũ marĩ pacu, Jesucristo marĩ wiogu musārẽ añurõ weeato. Musārẽ ejerisājācā weeato.

Jesucristore ějōpeorārẽ Pablo sērĩbosase ni'i

3 Yũ'u musārẽ wācūsetirinucũ yũ'u wiogu Õ'acūrẽ e'catise o'o'o. Musā añurõ weese bu'iri tojo wee'e. ⁴⁻⁵ Ne waropu musā Jesucristo ye quetire tũ'orā, yũ'ure weetamunũ'cāwũ. A'tiro nicā quẽ'rārẽ tojota weenu'cũ'u. Tojo weegu musā nipe'tirā ye niatjere Õ'acūrẽ e'catise me'rā sērĩbosanu'cũ'u. ⁶ Õ'acũ musārẽ añurõ weesere yũ'u masĩyũ'rucāpu'ticā'a. Õ'acũ musārẽ añurõ ducayunu'cācu niwĩ. A'tiro nicā quẽ'rārẽ ducayugu weemi. Téé Jesucristo a'tiri curapu tojo ducayuyapatigusami. ⁷ Yũ'u a'tiro wācũ'u: “Õ'acũ narẽ tojo ducayunu'cũgũsami”, ni'i. Yũ'u tojo wācūse añu ni'i. Musārẽ ma'ígũ, tojo busu'u. A'tiro ni'i. Ni'cārōacārẽ yũ'u bu'iri da'reri wi'ipu nicā, musā yũ'ure bu'ipejatamu'u. Wiorārẽ “Jesucristo masārẽ yũ'ruomi nise queti diacjũ ni'i” werecā quẽ'rārẽ, bu'ipejatamu'u. Tojo weerā Õ'acũ yũ'ure weetamusere musā quẽ'rā bu'ipejatamu'u. ⁸ Õ'acũ yũ'u musārẽ uputu ma'isere masĩmi. Yũ'u musārẽ ma'ígũ, Jesucristo cũ pajaña'se me'rā ma'i'i. ⁹ Musārẽ “Nemorõ a'merĩ ma'inemoato”, ni sērĩbosa'a. “Nipe'tisere añurõ masĩse me'rā tũ'ocasanũ'cōpe'oato”, ni'i. ¹⁰ Tojo weerā musā “A'tiro weeroua'a”, nĩmasĩrāsa'a. Ña'arõ weesere moorāsa'a. Jesucristo a'ticā, bu'iri marĩrā bocaejano'rāsa'a. Añuse dia'cũ wéerā bocaejano'rāsa'a. ¹¹ Jesucristota musārẽ

nipe'tisere añurõ weecã weegusami. Musã tojo weecã ï'arã, masã Õ'acũrẽ a'tiro wãcũrãsama. “Añuyu'rũami, añuse weemi”, nirãsama.

Jesucristo nipe'tise yu'rũoro niyu'rũnu'cãmi nise ni'i

¹² Yu'u bu'iri da'reri wi'ipu nimicã, Jesucristo masãrẽ yu'rũomi nise queti nemorõ se'sa wa'asa'a. Acawererã, musãrẽ tere masĩcã ua'a.

¹³ Yu'u bu'iri da'reri wi'ipu nígũ, surarare Jesucristo masãrẽ yu'rũomi nisere were'e. Tojo weerã nipe'tirã surara, wiogu ya wi'ipu co'terã a'tiro nima: “Cũ Jesucristore sirutuse wapa, bu'iri da'reri wi'ipu nimi”, nima. Æpẽrã quẽrã masĩpe'ticã'ma. ¹⁴ Yu'u bu'iri da'reri wi'ipu niyucã, pãjãrã marĩ acawererã wãcũtutuama. Te ye bu'iri na marĩ wiogure ãjõpeonemorã, uiro marĩrõ Õ'acũ ye quetire werema.

¹⁵⁻¹⁷ Æpẽrã pe'e yu'ure uorã, Jesucristo yere werema. Na bu'ese pe'ere sirutudutirã tojo weema. Na, na ye cjasere wãcũrã weema. Queoro wãcũtimirã, Jesucristo yere werema. Yu'u bu'iri da'reri wi'ipu nicã, cũrẽ bujawetise doquepejato nĩrã tojo weema.

Æpẽrã pe'e Jesucristo ye quetire añurõ weesi'rĩse me'rã werema. Yu'ure ma'ĩrã, tojo weema. Na a'tiro masĩma. “Cũ Jesucristo ye quetire queoro ucũse bu'iri cã bu'iri da'reri wi'ipu nimi”, nima. ¹⁸ Æpẽrã yu'ure ña'arõ weesi'rĩcã, añurõsa'a. No'o yu'ure ma'ĩrã, ma'itirã, Jesucristo yere wererã weema. Na tojo weesere tu'ogu, e'cati'i.

Tojo e'catinu'cũgũsa'a. ¹⁹ A'tiro ni'i. Musã sêrĩse me'rã, tojo nicã Espíritu Santu Jesucristo o'o'cu yu'ure weetamuse me'rã nipe'tise yu'ure wa'ase añurõ yapatirosa'a. A'tere masĩ'i. ²⁰ Yu'u Jesucristo yere weretigu, bopoyabosa'a. A'tiro pe'e Ɂasa'a. Uiro marĩrõ wãcũtutuase me'rã cũ yere werenu'cũsĩ'rĩsa'a. Ni'cãrõacã quẽ'rãrẽ yu'u weenu'cũrõnojõta weesĩ'rĩsa'a. Tojo weegu yu'u bu'iri da'reri wi'ipu ni'cu wi-jaacã, o yu'ure wẽjẽcã, a'tiro wa'acã Ɂasa'a. Nipe'tise yu'u weese me'rã Jesucristore masã nemorõ masĩcã Ɂasa'a. Cũ añubutiasere siape me'rã masĩnemocã Ɂasa'a. ²¹ Nipe'tiro yu'u catiro põtẽorõ Jesucristo Ɂaro weesĩ'rĩsa'a. Yu'u pe'ema cũ ãpẽrã, apeyenojõ yu'ruoro niyu'runu'cãmi. Yu'u wẽrĩgũ, cũ me'rã nigũsa'a. Cũ me'rã nicã, añuyu'rua'a. ²² Yu'u catigu, marĩ wiogu ye cjasere da'ramasĩ'i. Tojo weegu yu'u wẽrĩcã, o caticã, añu nibosari nímasĩtisa'a. ²³ A'te puaro besecã, diasã ni'i. Wẽrĩgũ, Jesucristo me'rã nibosa'a. Tojo weegu "Wẽrĩcã, añubosa'a", ni tu'oña'a. ²⁴ "Yu'u catigu pe'e, musãrẽ nemorõ weetamubosa'a", ni tu'oña'sa'a. ²⁵ Tojo weegu yu'u masĩ'i, musã me'rã nínigũti yujupu. Musãrẽ nemorõ weetamugũti nígũ, tojo weeguti. Tojo nicã musã ãjõpeose me'rã nemorõ e'catiato nígũ tojo weeguti. ²⁶ Tojo weerã apaturi yu'u musã tiropu nicã, Jesucristo yu'ure co'tese wapa, nemorõ cãrẽ e'catise o'orãsa'a.

²⁷ Nipe'tise musã weesetisere Jesucristo ye queti nĩrõnojõta weeya. Musã tojo weecã, musã tiro nígũ, o yoaropu nígũ, musã añurõ weesere tu'oguti. Musãrẽ ni'cãrõnojõ añurõ

ējōpeonu'cūcā ʉasa'a. Tojo nicā wācūtutuse me'rā ni'cārōnojō Jesucristo ye quetire were-turiacā ʉasa'a. ²⁸ Jesucristo ye quetire ʉatirā mūsārē ña'arō weecā, uiticā'ña. Tojo weerā na pecame'epu wa'atjere masīrāsama. Mūsā pe'e quē'rā uitirā, mūsārē yu'ruono'atjere ī'orāsa'a. Ō'acūta mūsārē yu'ruo, uiro marīrō nisetiā weemi. ²⁹ Ō'acū mūsārē ma'ígū, Cristore ējōpeodutiwī. Jesucristore ējōpeo'que bu'iri mūsārē ña'arō weerāsama. Te quē'rārē Ō'acū cūuwī. ³⁰ Jesucristore ējōpeose bu'iri marī ni'cārōnojō pi'eti'i. Toduporopu mūsā ya macāpu yu'ure tārā, bu'iri da'rerī wi'ipu cūucā ī'awū. Ni'cārōacā quē'rārē mejārōta yu'ure ña'arō weesere tū'osa'a.

2

Jesucristo wee'caronojō weedutise ni'i

¹⁻² Jesucristo mūsārē wācūtutua e'caticā weemi. Cū mūsārē ma'ígū, weetamumi. Espíritu Santu mūsā me'rā nimi. Tojo weerā mūsā ma'isere, pajaña'sere cuorā, a'tiro weeya. Añurō ni'cārō me'rā nisetiya. Ni'cārōnojō a'merī ma'ña. Espíritu Santu me'rā ni'cārōta wācūsetirā niña. Tojo weese me'rā yu'ure e'catinemocā weerāsa'a. ³ Mūsā ye dia'cūrē ʉasāticā'ña. “Āpērā yu'ruoro ni'i”, niticā'ña. Āpērā pe'ere “Añuyu'runu'cāma”, ni tū'ona'ña. ⁴ Mūsā ye cjase dia'cūrē “Añurō wa'ato”, ni wācūticā'ña. Āpērā ye quē'rārē “Añurō wa'ato”, ni wācūña.

5 Musā Jesucristo wācūseti'caronojōta wācūsetiya. Cū “Āpērā yu'ruoro añugū ni'i”, niticu niwī. 6 Cū Ō'acū nisetisere cuomigū, “Yu'u a'ti nucūcāpu a'tigu, Ō'acūrē ni'cārōwijisere ne du'usome”, niticu niwī. 7 A'tiro pe'e weecu niwī. Cū uaro me'rā cū wiogu nisere du'ucu niwī. Du'u, a'ti nucūcāpu a'tigu, apīrē da'raco'tegu weronojō wa'acu niwī. A'ti upu me'rā bajuacu niwī. 8 Tojo weegu masū weronojō bajugu, mejō nigū wa'acu niwī. Masā “Cūrē curusapu paabi'peya” nicā, cū pacure yu'tigu, yu'runu'cāticu niwī. Cū curusapu ña'arō wērīmigū, cū pacure yu'runu'cāticu niwī. 9 Cū, cū pacure yu'tise bu'iri Ō'acū nipe'tirā bu'ipu sōrōcu niwī. Cū wāmerē āpērā wāme yu'ruoro añurō wācūdutigu, tojo weecu niwī. 10 Tojo weerā nipe'tirā u'musepu nirā, a'ti nucūcāpu nirā, wērī'cārā Jesú wāmerē tu'orā, ejaque'ape'tirāsama. 11 Nipe'tirā “Jesucristo marī wiogu nimi”, nirāsama. Na Ō'acūrē, “Añuyu'ruami”, nirāsama.

Jesucristore ějōpeorā ña'arō weerārē añuse queose ĩ'orāsama nise ni'i

12 Acawererā, yu'u musārē ma'i'i. Toduporopu yu'u musā me'rā nícaterore yu'u duti'quere yu'tiwu. Ni'cārōacārē yu'u yoaropu ni'i. Tjāsa'a majā. Totā nemorō yu'tiya. Ō'acū musārē yu'ruocu niwī. Tere wiopesase me'rā wācūña. Tere wācūrā, “Āpērā yu'ruoro ni'i”, nirō marīrō nisetiya. Añurō niyapatiya. Ña'arō weeri nírā, tojo weeya. 13 A'tiro ni'i. Musārē Ō'acū añurō

weesĩ'rĩcã weesami. Cũ ɰaronojõ musãrẽ añurõ tu'ajanɰ'cõcã weesami.

¹⁴ No'o nipe'tisere wéérã tu'satimirã, ũrũsãse me'rã weeticã'ña. ¹⁵ Tojo weerã Õ'acũ põ'rã ña'ase marĩrã, bu'iri moorã nirãsa'a. Musã a'ti turicjãrã nisoori masã ña'arõ weesetirã wa'teropɰ ni'i. Musã añurõ wéérã, narẽ añurõ, queoro weesere ĩ'orãsa'a. ¹⁶ Añuse catise pe'titise quetire wererãsa'a. Musã añurõ weese me'rã yu'u musã tiropɰ bu'esija'quere a'tiro nigũti. Jesucristo apaturi a'ticã, yu'u mejõ waro narẽ bu'etipã nígũ, e'catiguti. ¹⁷ Masã musãrẽ ña'arõ weemicã, musã Jesucristore ějõpeonu'cũ'u. Musã ějõpeose Õ'acũrẽ añuse o'ose weronojõ ni'i. Yu'u Jesucristo yere werese wapa yu'ure wějěcã, Õ'acũrẽ añuse o'onemorõ weronojõ nirõsa'a. Tojo wa'acã, yu'u e'catigusa'a. Musã quẽ'rãrẽ e'caticã weegusa'a. ¹⁸ Musã yu'ure e'catitamurãsa'a.

Timoteo, Epafrodito ye cjase ni'i

¹⁹ Marĩ wiogu Jesú ɰacã, maata Timoteore musã tiropɰ o'óguti. Musã ye quetire tu'ogu, e'catiguti nígũ, tojo weeguti. ²⁰ Timoteo dia'cũ yu'u weronojõ wãcũmi. Cũ yu'u weronojõ musãrẽ añurõ wa'acã ɰagu, ɰputu wãcũque'timi. ²¹ Āpěrã na ye dia'cũrẽ añurõ wa'acã ɰasãsama. Jesucristo ye pe'ere tojo wãcũtisama. ²² Musã pũrĩcã Timoteo queoro weesere masĩtojasaa. Cũ yu'u me'rã ni'cũ cũ pacu me'rã da'ragu weronojõ Jesucristo ye quetire weretamugũ weemi. ²³ Tojo weegu yé cjasere añurõ masĩca be'ro cũrẽ musã tiropɰ o'óguti.

24 Cũrẽ o'ósĩ'rĩmigũ, yu'u quẽ'rã Jesucristo marĩ wioḡu o'ócã, maata musã tiropu wa'agusa'a.

25 “Apetero weegu Timoteo me'rã apĩ marĩ acawereḡu Epafrodito o'óroḡasato”, ni wãcũ'u. Epafrodito yu'u me'rã tutuaro Jesucristo yere weretamumi. Musã basu yu'ure weetamudutirã cũrẽ o'ócãrã niwũ. 26 Cũ musãrẽ pũrõ ĩ'asĩ'rĩmi. Cũ dutitise quetire musã masĩcã tu'ogu, pũrõ bujawetiwi. Tojo weegu cũrẽ o'óguti. 27 Diacjũta ni'i, pũrõ waro wa'awĩ. Wẽrĩse pu'to niwĩ. Cũ pũrõ dutitimicã, Ō'acũ cũrẽ pajaña'wĩ. Cũ se'sarore tojo weetiwĩ. Yu'u quẽ'rãrẽ pajaña'wĩ. Epafrodito wẽrĩcãma, yu'u nemorõ waro bujawetiyu'ruabopã. Tojo wa'acã uatigu, Ō'acũ cũrẽ yu'ruowĩ. 28 Musã cũrẽ ĩ'arã, e'catiato tja níḡũ o'ó'o. Musã e'catise quetire tu'ogu, yu'u quẽ'rã e'catigusa'a. 29 E'catise me'rã cũrẽ ñe'eña. Jesucristore ejõpeogu marĩ acawereḡu nimi. Nipe'tirã cũ weronojõ nirãrẽ añurõ weeya. 30 Epafrodito Jesucristo yere da'raco'tetjĩagũ, wẽrĩa wa'amiwĩ. Musã yu'ure weetamuta basiotisere weetamusĩ'rĩḡũ, tojo wa'awĩ. Tojo weerã cũrẽ añurõ ñe'eña.

3

Pablo “A'tiro nisetiroḡa'a” ní'que ni'i

1 Acawererã, ni'cãrõacãrẽ musã Jesucristo yarã nitjĩarã, e'catiya. Yu'u toduporo ní'quere apaturi ninemocã, yu'ure mejẽcã niwe'e. Yu'u ninemocã, añu ni'i musãrẽ. 2 Ña'arõ weerãrẽ tu'omasĩña. Na Ō'acũ yarã niato nĩrã nipe'tirãrẽ õ'rẽcju yapa caserore yejecõ'adutima. 3 Marĩ

pūrĩcã tojo weetimirã, Jesucristore ějõpeotjĩarã, diacjũ Ō'acũ dutisere añurõ weerã ni'i. A'tiro ni'i. Espĩritu Santu weetamuse me'rã Ō'acũrẽ ñubuepeo'o. Tojo nicã Jesucristo marĩpure niyucã, pũrõ e'cati'i. “Masã weesetise bu'icjase me'rã yu'rurãsa'a”, niwe'e. ⁴ Yu'u pũrĩcã “Yu'u weeseti'que ye bu'iri yu'rũgusa'a”, nĩmasĩ'i. Yu'u a'tere nipe'tirã nemorõ nĩmasĩ'i, nĩgũ pe'e. ⁵ A'tiro ni'i yu'ure. Ocho numurĩ yu'u bajuáca be'ro yu'u õ'rěcjũ yapa caserore yejecõ'acãrã niwã. Yu'u Israe curuacjũ Benjamí ya curuacjũ ni'i. Yu'u hebreo masũ ni'i. Yu'u pacusumua quẽ'rã náta niwã. Yu'u Moisé duti'quere ějõpeori masũ niyugũ, fariseo masũ niwũ. ⁶ Yu'u tere uputu waro ějõpeoyugũ, Jesucristore ějõpeori curuacjãrãrẽ ña'arõ weewũ. Moisé duti'quema queoro weewũ. Ne ni'cũ yu'ure “Queoro weetiwiĩ”, nĩmasĩtisami. ⁷ Toduporopure “Yu'u niseti'quere yu'ure añuyu'rua'a”, nĩmiwũ. Ni'cãrõacãrẽ “Yu'u Jesucristore ějõpeogu, nipe'tise toduporo cjase wapamarĩ'i”, ni tu'oña'a. ⁸ Apeyema, yu'u wiogu Jesucristore masĩse wapatiyu'rua'a. Apeyenojõ yu'u cuobo'que nemorõ wapati'i. Jesucristore ějõpeose bu'iri nipe'tise yu'u weeseti'quere, niseti'quere marĩ uatisere cõ'arã weronojõ cõ'awũ. Jesucristo yu'u wiogure cuosĩrĩgũ, tojo weewũ. ⁹ A'tiro u'a'a. Jesucristore yu'u me'rã nicã u'a'a. Moisé duti'quere weese me'rã Ō'acũ yu'ure “Añugũ nĩmi”, nĩsome. Yu'u Jesucristore ějõpeose me'rã pe'e Ō'acũ yu'ure añurõ i'asami. Yu'u ějõpeose bu'iri yu'ure queoro

weecã weemi. ¹⁰ Yũ'u a'tiro dia'cũ weesĩ'rĩ'i. Cristore añurõ masĩsĩ'rĩ'i. Õ'acũ cũ tutuaro me'rã yũ'ure ducayunu'cũcã ھا'a. Cũ tutuase me'rã Cristore masõcu niwĩ. Cristo cũ pacu yere wéégũ, pi'eti, curusapu wẽrĩcu niwĩ. Yũ'u quẽ'rã Õ'acũ yere uputu weesĩ'rĩ'i. Jesucristo yere wẽrĩgũpu, weetuosi'rĩ'i. ¹¹ Wẽrĩ'cãrã masãmujãarãsama. Yũ'u quẽ'rã na weronojõ mejãrõta masãmujãasĩ'rĩsa'a.

Marĩ añurõ yũ'rũsĩ'rĩrã, wãcũtutuarõ ھا'a nise ni'i

¹² Yũ'u a'te nipe'tisere “Jesucristo weronojõ weetu'ajanũ'cõpe'otoja'a”, nigũ mejẽta wee'e. Nipe'tisere queoro weewe'e yujupu. Tojo weetimidã, Jesucristo yũ'ure cũ yagu sãjãcã weet-ojacu niwĩ. Tojo weegu cũ weronojõ nisĩ'rĩgũ, tutuaro me'rã cũ yere wee'e. ¹³ Acawererã, “Yũ'u nipe'tisere queoro weetoja'a”, niwe'e. A'tiro pe'e wee'e. Toduporo yũ'u wee'quere wãcũwe'e. Be'ropu niatje pe'ere añurõ weetu'ajasĩ'rĩgũ, wãcũtutua'a. ¹⁴ Añurõ tu'ajanũ'cõsĩ'rĩ'i. Õ'acũ u'musepu o'otjere ñe'esĩ'rĩgũ, nipe'tise cũ yere tutuaro me'rã wee'e. Marĩ Jesucristore ejõpeorã niyucã, marĩrẽ catise pe'titisere o'ogusami.

¹⁵ Nipe'tirã Jesucristore añurõ ejõpeorã yũ'u ní'caronojõta wãcũrõ ھا'a. Musã mejẽcã wãcũcã, Õ'acũ musãrẽ diacjũ wãcũcã weegusami. ¹⁶ Marĩ Jesucristore ejõpeodu'pocãti'caronojõta queoro wãcũ, queoro tu'ajanũ'cõrõ ھا'a.

¹⁷ Acawererã, yũ'u weesere ï'acũu siru-tuya. Æpẽrãrẽ ãsã weronojõ weerãrẽ na

weese quẽ'rãrẽ ï'acũũa. ¹⁸ Toduporopu pejetiri musãrẽ weretojawu. Utise me'rã ninemogũti tja. A'tiro ni'i. Pãjãrã na ña'arõ weese-tise me'rã Jesucristore ï'atu'tirã weronojõ nima. Na cũ curusapu wẽrĩ'quere yabirã weronojõ weema. ¹⁹ Be'ropure pecame'epu yapatirãsama. Õ'acũrẽ ãjõpeotima. Na uaripejase dia'cũrẽ ãjõpeoma. Bopoyaronojõ o'orã, na weese pe'ere "Añuyũ'rũa'a", niyũ'rũnũ'cãma. A'ti nucũcã cjase dia'cũrẽ wãcũma. ²⁰ Marĩ pũrĩcã u'musepu wa'ari masã ni'i. Topu marĩ ya macã ni'i. Marĩ wioгу Jesucristo marĩrẽ yũ'rũogũ u'musepu nimi. Cũ a'ti nucũcãpu apaturi a'tiatjere yucuerã wee'e. ²¹ Cũ marĩ ya upu a'ti upumejãrõrẽ ducayugusami. Cũ ya upu weronojõ añubutiari upu weegusami. Cũ nipe'tisere cũ doca tojacã weegusami. Cũ tojo weemasĩrõnojoĩta mejãrõta cũ tutuaro me'rã marĩ quẽ'rãrẽ ducayugusami.

4

Jesucristo me'rã e'catinu'cũdutise ni'i

¹ Jesucristo marĩrẽ cũ ya upu añubutiari upure weronojõ weegusami. Tojo weerã acawererã yũ'u mairã, Jesucristore ne ãjõpeodu'uticã'ña. Musãrẽ pũrõ ma'i'i. Pũrõ ï'asĩ'rĩ'i. Musã yũ'ure e'caticã wee'e. Musã queoro weese me'rã yũ'u bu'e'quere ï'o'o.

² Apeyema, musãnumia Evodia, Sítique, marĩ wioгure ãjõpeoyurã, a'merĩ musã basu pe'sutiticã'ña. Ni'cãrõnojoĩ wãcũña. ³ Sícigo, mu'u yũ'u me'rã weretamugũ waro ni'i. Na numiarẽ ni'cãrõnojoĩ wãcũcã weeya. Õ'acũ

masārē yu'ruomi nise quetire werecā, na numia yu'ure weretamuwā. Na me'rā Clemente quē'rā niwī. Tojo nicā āpērā na me'rā yu'ure weretamuwā. Na Ō'acū ya pūrī catinu'cūse nirī pūrīpū ojaō'ono'cārā nitojasama.

⁴ Musā Jesucristo yarā nitjīarā, cū me'rā e'catinu'cūcā'ña. Apaturi ninemogūti. E'catidu'uticā'ña. ⁵ Musā āpērārē pajaña'sere nipe'tirā masīato. Marī wiogu a'tiatjo cā'rōacā dū'sa'a.

⁶ No'o de'ro wa'asere wācūque'titicā'ña. A'tiro pe'e weeya. Nipe'tise musārē no'o wa'asere Ō'acūrē sērīña. Cūrē sērīrā, e'catise o'oya.

⁷ Musā tojo weecā, Ō'acū ejerisājācā weegusami. Cū tojo weese añubutiasē ni'i. Masā na tū'opōtēotise ni'i. Musā Jesucristo yarā niyucā, musārē añurō ejeripō'rāticā weegusami. Tojo nicā musā wācūsepure añurō tū'oña'nu'cūcā weegusami.

Añuse dia'cūrē wācūnrūdutise ni'i

⁸ Acawererā, yu'u a'tiro ojatuguti. Nipe'tise diacjū nisere wācūña. Nipe'tise a'teta wiopesa'a nisere wācūña. Queorota nitū'sa'a nisere wācūña. Añuse warore wācūña. Añuse tū'sasere wācūña. Masā añurō ucūno'sere wācūña. Nipe'tise añusere, e'catipeosenojōrē wācūña.

⁹ Yu'u musārē bu'egu ucūcā tū'o'quere “A'tiro weerua'a” nī'quere weeya. Yu'u de'ro weecā ī'a'quere weeya. Tojo weecā, Ō'acū ejerisājāsere o'ogu musā me'rā nigūsami.

Filipocjārā Pablore niyeru weetamu'que ni'i

¹⁰ Musã yu'ure apaturi weetamusere ï'agũ, yu'u marĩ wiogu me'rã pũrõ e'cati'i. "Musã yu'ure wãcũtiwũ", nigũ mejẽta wee'e. Musãrẽ yu'ure weetamuta basiotiwũ. ¹¹ "Apeyenojõ yu'ure du'sa'a", nigũ mejẽta wee'e. No'o yu'u cuose me'rã e'catimasĩ'i. ¹² Yu'u pajasecuogu e'catise me'rã nĩmasĩ'i. Peje cuogu quẽrã nĩmasĩ'i. Yu'ure no'o de'ro wa'acã, e'catise me'rã nĩmasĩ'i. Yu'u yapigu, yapitigu quẽrã, e'catimasĩ'i. Peje cuoyu'rumajãgũ, e'catimasĩ'i. Móógũ quẽrã, e'catimasĩ'i. ¹³ Jesucristo yu'ure tutuase o'ogu me'rã nipe'tisere nu'cãmasĩ'i. ¹⁴ Tojo nimicã, yu'u pi'etiri cura yu'ure weeta-murã, añurõ weewũ.

¹⁵ Musã Filipocjãrã a'tiro masĩ'i. Yu'u Macedonia di'ta musã tiropũ niwũ. Topũ nígũ, musãrẽ Jesucristo yere werenũ'cãwũ. Be'ro apesepũ wijawã'cãwũ. Filipopũ ní'cu wijacã, musã dia'cũ yu'ure weetamurã niyeru o'owũ. Jesucristo ye quetire tu'o'que wapa e'catirã, tojo weewũ. ¹⁶ Yu'u Macedoniapũ ní'cu wijase duporo Tesalónicapũ nínicã, musã pejetiri yu'ure niyeru o'owũ. ¹⁷ Yu'u musãrẽ apeyenojõ o'oro dia'cũ uagu mejẽta wee'e. A'tiro ua'a. Õ'acũ ï'orõpure ãpẽrãrẽ apeyenojõ o'o'que me'rã musã nemorõ cuocã ua'a. Musã o'ocã, Õ'acũ musãrẽ añurõ weegusami. ¹⁸ Nipe'tise Epafrodito me'rã musã o'o'quere ñe'etojawũ. Tere ñe'egũ, yu'u uase nemorõ cuo'o. Musã o'o'que Õ'acũrẽ o'ose weronojõ ni'i. Cũ tojo weesere tu'sami. ¹⁹ Õ'acũ yu'u wiogu nipe'tise musãrẽ du'sasenojõrẽ o'ogusami. Cũ Jesucristo

me'rã peje waro añubutiasẽ cuoyu'runu'cãmi.
Cũ cuosenojõrẽ musãrẽ o'ogusami. ²⁰ Marĩ pacu
Õ'acũrẽ e'catipeonu'cũrã. Tojota weerã.

Pablo añudutituo'que ni'i

²¹ Nipe'tirã Jesucristore ãjõpeorã añuato. Marĩ
acawererã yu'u me'rã nirã musãrẽ añudutima.

²² Nipe'tirã a'tocjãrã Jesucristo yarã romano
masã wiogu ya wi'ipu nirã quẽ'rã añudutima.

²³ Marĩ wiogu Jesucristo musãrẽ añurõ weeato.
Tocã'rõta oja'a.

Pablo.

Õ'âkã hi yeere uúkũri turi Tukano New Testament in Tucano (BR:tuo:Tucano)

copyright © 2009 Wycliffe Bible Translators, Inc.

Language: Tucano

Translation by: Wycliffe Bible Translators, Inc.

Tucano [tuo], Brazil

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tucano

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-12-01

PDF generated using Haiola and XeLaTeX on 11 Nov 2022 from source
files dated 9 Oct 2020
00ebd04f-7b0d-5a72-9407-eb53ae2bd086